

A Is K'anej Dios Bay Cham

MIQUEAS

Is beyc'ulal Dios yiban Samaria

1 ¹A ton wal juntzan k'anej ti' max yal Jehová bay Miqueas aj Moreset yet max ec'c'al Jotam, Acaz, c'al Ezequías yin reyal bay Judá. A Cham max tx'oxon yila', tzet ok yun Samaria c'al Jerusalén. Yuj tu' xan max yalil Miqueas axca ti':

²E masanil ex conoblak, abek juntzan ti'; chi cam wal e yaben e masanil ex cajan ex bay yulyibank'inal ti': A Jehová Cham Yajaw, a wal bay is templo ok yalaj Cham e mul.

³Ok eltek Jehová bay cajan ec'ok, cax ok bey tit yiban jolomlak witz.

⁴Ok uljoktok witzlak tu' yalan yakan, axcaxac'al chi yun yuljitok ixcab xol k'ak'ej. Masanil jobelak ok pojchajtok, axca wal chi yun yay nan tx'otx' yuj a' elom aej.

⁵Ok yun juntzan ti', yujc'al wal is pitalil eb yinatil Jacob, yuj mulej bay yul is makbej Israel. ¿Baytal chi txecloj is tenomtakil eb yinatil Jacob? A bay conob Samaria. ¿Baytal chi txecloj is ayilal eb aj Judá bay is comon diosal? A bay Jerusalén.

⁶Yuj wal tu' xan chi yal Jehová axca ti': Ok wak' lajwok ay jun conob Samaria ti', toxac'al ok aj can bulan is pojiltakil. Jakanxac'al ok yuncan axca bay chi je' yawlay uva, atac'al bay yulak jobe ok in k'okcan aytok is ch'enal jun conob ti', cax ok txeclojcan ajtek is cimiental yich.

⁷Coc'xac'al ok yuncantok juntzan yechelej. Ok wak' lajwok juntzan comon dios tu'. Masanil juntzan yelbubal yul templo ok tz'acantok. Yujtol a yetok tumin yet ajmulal watx'nebil. Ac'ala' tzet c'am chi tz'a'i, yin ajmulal ok tokcan juntzan tumin tu' junelxa, xi Jehová.

Is cusc'ulal Miqueas

- 8 Yuj wal tu' xan chin ok' yuj cusc'ulal. T'iran in elok, c'amoc in xanab chin ec'jabi. Toxac'al chi el waw axca junok no ok, ma axca junok no yune' avestruz.
- 9 Yujtol a is yas Samaria, majxa anchajok. Mayal tzakay c'apaxtok Judá yuj yailal tu', masantac'al max apni oc bay ti' conob Jerusalén, a ton is conobal eb wet conob.
- 10 C'am che yal juntzan ti' bay eb cajan bay Gat. C'amokab chech ok' satak eb. Ayanek telan xol pokok yuj e cusc'ulal tu' bay Bet-le-afra.
- 11 Axa ayex cajan ex bay Safir, asech can preso, t'iran ex elok. Yinxac'al q'uixwiltakil chech ilaytok. C'amxa jabok chi eltek eb cajan bay Zaanán. Ay ok'il bay Bet-esel, c'amxa mactxel ok oc e yetok.
- 12 A eb cajan bay Marot, chi mak jay eb colwal yujtol mayal apni yailal bay ti' conob Jerusalén yuj Jehová.
- 13 Axa ayex cajan ex bay Laquis, caw wal pit ex axca eb israel. A yuj e pital tu' xan max oc mul eb aj Sión. Aek oc e chej yin carruaje yet owal.
- 14 Junelnej che yalxac'al can toj e ba bay Moreset-gat. A jun conob Aczib, axca iom aytek satej ok yun bay eb reyael Israel.
- 15 Max yalon Jehová e yin ayex cajan ex bay Maresa: Ok watok jun mactxel ok ex ak'on ayc'ayok, axa jun mac binajbil xol eb israel, ok tok c'ubaj el ba bay yulak nach'en bay Adulam.
- 16 A wal ayex ti' tzukek el xil e jolom yuj cusc'ulal, yujc'al juntzan e yuninal tol ay wal e camc'ulal yin. Cak t'irinaxcac'al chi yuncan e jolom tu', axca jolom no xulem. Yujtol a eb e yuninal tu' ok ilaytok eb yin presoal, xi Jehová.

Ok'bal c'ul eb etnem meba'

2 1 Ok'bal c'ul wal ok yun eb tol cal wayan chi naobtanen tzet yetal yobtakil ok yunej, axa yet chi k'inibi aj xin, cax chi yunenxac'al eb tzet chi na tu', yujtol ayic' yul k'ab eb yuneni.

2 Ta chi yiloc c'ulok yin junok tx'otx', cax chi tok'onxac'al ec'ok, chi yiloc c'ulok yin junok na, cax chi yelk'aneni. Axca tu' chi yun yetnelay eb anima yetok yuninal yuj eb.

3 Yuj wal tu' max yal Jehová axca ti': Ayin ti', ay wal tzet chin na' c'apax e yin ayex ti'. Ok watok junok miman yailal e xol, c'amxa tzet watx' ok yun e colchaji. Tok okto e maynej e ba e yec'jabi, yujtol is c'ualxa jun miman yailal.

4 A yet jun c'ual tu' ok tz'ak bitnej eb ajc'ul bit, yuj ex buchon eb. Ok yal eb axca ti': A wal tinani', mayal wal on lajwi ay junelnej, c'al co conobal tol yet Jehová yayji, mayal q'uexchaj yajaw. C'amxa

mactxel max je' tenchaneni. A eb max on ak'on ayc'ay tu', mayal pojic' eb co tx'otx' yin, xi jun bit tu', xi Cham.

- 5 Yuj e yobtakil tu' xan c'amxa mactxel xol is conob Jehová ok je' yechen janic'ok e satak.

Juntzan chekbej Dios man watx'ok

- 6 Chi yalon eb anima ayin: ¡Manchak al ayon, yuj yailal ok jayok! Tokwal ok jay jun q'uixwilal tu' jiban.
- 7 Tokwal catabnebil conobal Jacob, ¿tom mayal lajwi is mimanc'ulal Dios, xan caytu' ok yunej? xi eb. Xan chi tak'wi Jehová: ¿Tom man watx'ok chi yun in k'anej bay mactxel tol tojol chi yut ba?
- 8 Ayex ti', chex oc ajc'ulal yin in conob. A eb chi meltzotek yin owal chi na' eb tol c'amxa tzet ok on eb; axa ayex ti', che yiel is watx' pichil eb.
- 9 Che yuktej eltok eb ix ix yulak is yatut tol ayoc yipok c'ul, cax che yion ec' yin junelnej is satak eb unin max wak'a'.
- 10 Ajanek wan, cax chex tojc'al. C'amxa chi je' chex ayji ec' cayti', yujtol xiwilxa yobtakilal max e yun sat tx'otx' tx'otx' ti', xan mayal etax el yin junelnej.
- 11 A ayex ti', a wal junok lek'ti' chekbej che yochej, junok chi ec' yalilok tol xiwilxa e vino c'al e trago ok e yi', xi Cham.

Chi yal Dios tol ok col is conob

- 12 Chi yalon c'apax Dios axca ti': Ok ex in wajbaj oc masanil ex yinatil Jacob. A ton ayex aj Israel chexto caní. Ok ex in wajbaj, axca chi yun wajban junok ilom calnel no calnel bay is corral. Axca c'apax junok ac'al nojnak el yuj calnel, caywal tu' ok yun nojil e tx'otx' e yuj ayex ti'.
- 13 Babel in toj in jakon be e satak, cax tzakan ex oc wintak. Axa e yeltok bay is puertail miman conob yin bekanilal tu'. Ayin caw Jehová in, e Reyál in, babel chin toj e satak, xi Cham.

K'anej chi al-lay yin eb yajaw yob

- 3** 1 Catatu' max waloni: Ex yajawil conob Israel, abek wal tinani'. ¿Tom man e mojak ayex ti' e yojtaknen el tzet yetal tol tojol?
- 2 A ti' e yet, tol che yaj can el tojolal tu', axac'al yobtakil che camc'ulnej. Axca wal tol che tzilel is tz'umal eb jet conob, axac'al is bakil chi can jalan e yuj.
- 3 Axca wal tol yin yiquisal in conob, cax che chion aytok, che nic'on el is tz'umal eb, cax che pak'on k'aj is bakil. Lajanxac'al che yut eb axca chibej chi toj taj yul xij.
- 4 Ay wal jun c'ual ok e yawtej Jehová; palta manxa ok tak'wok Cham ayex. A yet jun c'ual tu', ok c'ubajxac'al el ba Cham ayex yuj wal e yobtakil max e yaocok, quin chi.

- ⁵ Axca ti' yalon Jehová: A in conob ti' caw wal ayc'al oc yul beal man tojolalok, yujc'al eb lek'ti' chekbej, tol chi alon elok tol ayc'al junc'ulal ta chi tojlanelay yin watx' bay eb. Axa pax bay mactxel c'am chi ak'on noj c'ul eb, chi yak'on eb owal yin eb. Xan chi wal yin juntzan chekbej tu':
- ⁶ Ok aycan aj c'u yiban eb, axa can eb xol k'ekk'inal tu'. C'amxa yechel ay tzet ok tx'oxlay yil eb junelokxa, tamwal okto yalil eb tzet yetal ok uj yet yajtok tu', quin chi, xi Jehová.
- ⁷ A juntzan chekbej tu', c'al juntzan naom el k'anej tu' yaloni, toxac'al ok cancan eb yin c'am ujnakilal, toxac'al ok tz'injokcan el eb, yujtol c'am jabok is paktzebal eb ok cha bay Dios.
- ⁸ Axa pax ayin ti', ayoc Yespíritu Jehová win, xan ay wipalil, cax chi nachaj el tojolal wuj, xan chin tec'baj in ba walon oc yin sat Israel jantak is mul.
- ⁹ Abek juntzan ti' tinani' xin, ex yajawilal conob Israel, ayex ti' che yajil tojolal. A jun tu' che q'uxetok yin man tojolalok.
- ¹⁰ Che watx'nej aj Jerusalén a ton conob yet tzalan Sión yuj tzet che yi' yin e mak'on cam anima, c'al yin man tojolalok che yunej.
- ¹¹ A eb juezal conob, chi watx'nej el eb k'anej eb yet animail yin man tojolalok, yuj chaon eb tumin. Ac'ala' eb sacerdote chi cuywaj eb, asan yuj chaon eb tumin, c'al eb lek'ti' chekbej Dios, asan yuj chaon tumin xan chi yal eb tzet max tx'oxlay yil eb yaloni, cax chi yalon eb tol ayoc Dios yetok eb, xan chi yal eb axca ti': A Jehová ayoc jetok, xan c'am tzet yetal ok ec'tok jiban, xi eb.
- ¹² Yuj wal tu xin, e yuj wal ayex ti', xan a Jerusalén, conob yet tzalan Sión, axcac'al tol t'ocbil yetok arado ok yuncanok, cax toxac'al ok aj can bulan is pojiltakikal, axa bay tzalan yet templo, eltzab ac'un ok ch'ibajok.

A Jehová ok yajawbok yin junc'ulalil

(Is 2.2-4)

- 4** ¹ A yet lajubal, ok canxac'al can jun tzalan bay ayic' is templo Jehová. A jun witz tu', yelxac'al can ok yun tel yintak juntzanxa witz. Lajwi tu xin, masanil juntzanxa nacionlak ok jayoc bay.
- ² Xiwilxa bisil conoblak ok yaltek bay junjun axca ti': Sebaxek, ajokonektok bay jolom witz bay ay is templo Jehová, is Diosal Jacob, yet watx' chon is tx'ox yin is beybal, cax chi co beybalneni, xi mi eb. Yujtol a bay Sión tu' ok eltek cuybanilej yet Jehová, ata bay Jerusalén tu' ok eltek is k'anej Cham.
- ³ A Jehová ok beyc'ulnen el k'anej xolak nación. A' ok alon tzet ok yun nacionlak tol tec'an, caxc'al najat ay. Yuj tu' ok meltzoy oc is yespada eb yin aradoal, yetok c'apax is lanza eb, ok meltzoy oc

yin jobal trigoal, yujtol c'am junokxa conob ok yi aj is yarma yin junokxa, c'amxa mactxel ok cuywok yin ak'oj owal.

- ⁴ Masanil anima ok ayjok ec' yin c'amxac'al xiwc'ulalil. Junjunxac'al ok je' xew bay yalan yenel k'ab is yuva, c'al bay yalan yenel k'ab is yigo. A Jehová Cham Yajaw yin Masanil chi yak' is ti' yin jun ti'.
- ⁵ Masanil conoblak chi ec'jab yetok yipalil is diosal junjun yaloni. Cayon c'apax tu' ayon ti', a yetok yipalil Jehová co Diosal ok on ec'jabc'al yin tojbalk'inal.

A Jehová ok colil is conob

- ⁶⁻⁷ A wal caw Jehová chi alon axca ti': A yet jun c'ual tu', ok in wajbaj oc in conob, a ton eb mayal yab yail wuj bay tx'ok conobal, a ton eb k'ajil, eb c'unbinak, c'al eb sakleminak yayji. Yetok juntzan okto iquisbokcan ec' tu', ok in watx'nej jun nación tol caw wal ay is may ok yunej. Ayin wal caw Jehová in ok in yajawbok yiban in conob tu' bay tzalan Sión yin tojbalk'inal.
- ⁸ Atac'al bay tzalan Sión yet Jerusalén ok in taynej in conob axca junok ilom calnel. Axa Jerusalén ti', ok yajawbok junelxa yin is makbej bay max yajawbi yet payxa, xi Cham.
- ⁹ A tinani' xin ex aj Jerusalén, ¿tzet yuj xan tol chi el e yaw axca ix ix yet chi ajapnok c'ual watx'ji c'ul yuj yune'? ¿Tom yuj c'am junok rey bay ayex ti'? ¿Ma yujtol c'amxa junok eb aom oc nabalej e xol?
- ¹⁰ Ex aj conob Sión, abek yail; elokab e yaw yuj yailal, axca wal yailal chi yab junok ix ix yet chi watx'ji c'ul yuj yune', yujtol ok ex el bay yul e conobal ti', cax ok ex tok cajay bay xolak te'; toltax ok ex apnoktac'al oc bay Babilonia. Axa bay tu' ok ex col-lay el yul k'ab eb e yajc'ul yuj Jehová.
- ¹¹ A tinani', xiwil nacionlak lanan yaj wan yin ajc'ulal e yin, cax chi yalon eb axca ti': Ok jak' wal co nabal jilon tzet ok yun yetaxtok Sión ti', xi eb.
- ¹² Palta a juntzan nación tu', man yojtakok eb tzet yetal nabil yuj Jehová. Man yojtakok eb tatol ok wajlay aj eb yuj Cham, axca wajlay tok ixim trigo bay tec'bal.
- ¹³ A ayex aj Sión ex ti', ajanek wanok, teq'uek ay nacionlak, yujtol chi yal Jehová axca ti': Ayin ok wak' e yip e tec'on ay juntzan nación tu', axca junok toro tol hierro yuc'a', c'al tol bronce is yisk'ak tol ok tec'wok trigo. Ok e yiec' is beyomal max yi' juntzan nación tu' yin man tojolalok, cax ok e yak'on ayin, ayin ton Yajaw in yin masanil yulyibank'inal, xi Cham.

Ok ak'lay junok Reyaj conob Israel yuj Jehová

5 ¹Ex aj conob Sión, watx'nejek oc murallail e colbalba, yujtol max jayoc oyan eb ajc'ul e yin. Ok mak'tok eb sat cham yajawil Israel yetok c'ax.

²Chi yalon Jehová axca ti': A pax conob Belén Efrata, caxc'al yaliḡ xol conoblak yul yet Judá, palta a bay tu' ok tit jun yajaw ok waoc yin yajawilal yiban in conob Israel. Ok tit yin jun inatilej tol ayc'alta' yettax payxa, ayc'alta' yettax yichbanil, ḡi Cham.

³Axa tinani' xin, ok bekcan Jehová is conob, masantac'al yet ok jay jun yune' ix ix lanan yechbanen jay tu'. Catatu' ok meltzoy eb israel ibilcantok preso bay tx'ok conobal, cax ok wajban ba eb yetok eb yet conob.

⁴A cham Rey tu' ok aj wan taynen is conob yetok yipalil c'al yikbej Cham Jehová co Diosal, cax ok ayjok ec' eb yin junc'ulalil, yujtol a Cham Rey tu', miman ok yun yelapnok xol conob, masantac'al bay lajubal tx'otx' tx'otx'.

⁵A wal caw Cham ok iontek junc'ulal. A wal yet ok jayoc eb asirio yul co nación ti', yuj yoc eb yulak co cuartel, ok co chektok ukwan eb yajaw, yetok waxakwan tol mimek yelapnok, yuj yak'on owal yin eb.

⁶A eb tu' ok ak'on ayc'ay eb aj Asiria, a ton is nación Nimrod yetok espada. Ok on colchaj el yuj Cham bay eb asirio, a ton bay eb max k'axpoj ec'tek bay co mojon yin yion ec' eb co tx'otx' yaloni.

⁷A yet tu', a conob Jacob maxto cani ok yitek watx'ilal xol xiwil conob, axca chi yun yak'on yaxilal yal ak'bal, ma nab yiban an ac'un. A Jehová ok ak'onok, cax manak bay eb anima ok titok.

⁸Lajan wal ok yun pax is conob Jacob tu' nan xol xiwil nacionlak axca junok no coj ay xol no xolakilteal no', ma axca junok no coj chi oc xol junok bulan calnel. A yet chi oc no' xol no' tu', cax chi mitx'oni, chi coc' tzilnentok. C'amxa junok chi bekcan el yin yiquisal.

⁹Axca wal tu' ok yun e yak'on ayc'ay eb ajc'ul oc e yin, c'al e yak'on lajwok ay eb, ex yinatil Jacob.

¹⁰A wal caw Jehová chi alon axca ti' bay eb israel: A yet jun c'ual tu', ok in mak' cam no' e chej, cax ok wak'on lajwok ay e carruaje yet owal.

¹¹Ok wak' lajwok ay e conobal, c'al e cuartel yin junelnej.

¹²Ok wak' lajwok el masanil eb ajbal e xol. C'amxa junok eb naom el k'anej ok wak' canok.

¹³Ok wak' lajwok e comon dios, c'al ch'en ch'en yet e txajbal, yet watx' manxa ok ex oc ayilal bay juntzan e diosal max e watx'nej aj tu'.

¹⁴Ok wocaj masanil te te' bay chex oc ayilal, cax ok wak'on lajwok ay e conobal yin junelnej.

- 15 Yetok wal yowal in c'ul cax ok in paktzen bay juntzan nacionlak tol c'am wal jabok max yikej ayin, xi Jehovah.

Chi yak' Dios yowalil tzet yob chi yun Israel

- 6 ¹Ajan wan ach Jehovah, cax chalon is mul conob Israel satak tx'otx' witzlak, cax yabokab tx'otx' tzialanlak yul a nuk'.
²Yabokab witzlak, c'al cimiental yich tx'otx' tx'otx', tol ok al mul a conob, cax ok ak'on owal yetok eb israel.
- ³Ex Israel, chi cam wal e yaben tzet chi yal Jehovah. Chi yal Cham axca ti': Tak'wanek ayin, ex in conob. ¿Tzet max ex yun wetneni, ma tzet max ex wutej?
- ⁴Ilab ayin max ex wieltek bay Egipto, max ex in colon eltek bay ayex oc mosejal. Ayin max in chektok Moisés, c'al Aarón yetok María, a ton eb max ex ikbani.
- ⁵Ex in conob, naektek tzet yetal nabil yuj Balac reyal Moab, axa is paktzebal max yak' Balaam is c'ajol Beor. Naek c'apaxtek tzet max uj bay nan xol Sitim yetok Gilgal, cax che naontek, tzet max ex wut in coloni, xi Jehovah.

A tzet chi yochej Jehovah bay eb anima

- ⁶Chi k'anlej eb israel axca ti': ¿Tzet ok jak' bay Jehovah yet ok on oc yin ayilal bay, a ton Cham Dios Axac'al Ocoq? ¿Ok mi on oc satak Cham yetok no calnel jun abil is k'inal, yet chi jak' tz'a no' yin xajanbalil?
- ⁷¿Ok mi wal tzalojbok aj Jehovah, ta chi jak' junok mil no icham calnel yin xajanbalil, yetok junok lajoneb mil nuk' aceite tol chi bey yakan? ¿Ma xin, ta chi jak' co babel unin yin xajanbalil yuj co yobtakil? xi eb.
- ⁸Chi paktzej is chekbej Dios: Ex wet conob, mayal yal Jehovah tzet yetal tol watx' yul is sat, c'al tzet yetal tol chi yochej Cham ayon, a ton juntzan ti': Tojol chi jut co ba, ayokab co camc'ulal yin eb jet animail. Yin yaynakilal yikem chi jut co ba bay Cham co Diosal, xi is chekbej Dios.
- ⁹Lanan yawji Jehovah bay is conob; chi yalon Cham axca ti': Aj nabal mac chi cam yaben yin yaynakilal. Jayokab e nabal yuj yailal, ayokab welapnok yul e sat, ayin tol chi waoc yailal tu'.
- ¹⁰¿Tom ok tok c'ayc'ulal wuj tol a bay yatut eb yobtakwom, xiwilxa beyomal wajan ec'ok tol max yi' eb yin yobtakil, yetok c'apax juntzan echbal man tz'akanok, tol yajbil wuj?
- ¹¹¿Tzet ok yun wak'on mimanc'ulal yiban juntzan anima ti', tol a echbal man tz'akanok chi k'an eb?
- ¹²A juntzan beyom xol conob ti', elk'om eb, etnem anima eb. Jantak ex cajan ex bay jun e conob ti', lek'ti ex.
- ¹³Yuj wal tu' xan ok waoc e yailal. Ok ex wak' lajwok ay yuj e mul.

- 14 Ok ex lowok, palta man ok noj e c'ul, ac'ala' tit e wajil. Ok e wajaj e tzetok yetal, palta man ok colwaj jabok e yetok. Ta c'uxan ayto wal tzet ok colchaj el e yuj xin, axa yin owal ok wak' lajwok ayok.
- 15 Ok e yaw e yawoj, palta c'am jabok tzet ok e wajajok. Ok e tec' e yolivo, palta man ok e k'an jabok aceite. Ok e tec' e yuva, palta man ok e yuc' vino.
- 16 Yujtol che yikey tzet yetal max yal Omri, c'al Acab is c'ajol, cax che beybaln enxac'al is beybal eb max beybalnej. Yuj tu' xan ok wak' jayoc yailal c'al buchwal k'anej e yiban. Caytu' ok yun e yaben yail q'uixwilal satak eb acaw in conob, xi Jehová.

Is yobtakil conob Israel

- 7** ¹ Max yalon is chekbej Dios: ¡Ay... ok'bal in c'ul! Lajan inxac'al axca eb chi ec' sayoj uva, ma higo yet chi lo', yet mayal lajwi ec' sat awoj. Palta c'amxa an satej maxto cani, tamwal an babel satej caw ochebil.
- ² Axca tu' wayji, yujtol c'amxa chi ilchaj junok anima tol watx', ma tojtolto is nabal satak Dios. Asanxanej mak'oj cam anima chi yochej eb chi yunej. Chi yalej ay eb yal is satak junjun.
- ³ Mehtëtol wal eb yin yunen yobtakil. A eb ay yikbej, toxc'a chi yi wal ec' eb pak bay yet conob; axa eb juez chi cha eb montebal tumin chi ak'layi. A eb tol mimek yelapnok, chi yun eb tzet yetal chi tit yin c'ul. Chi junanen ba eb tu' yin yetnen eb yet animail.
- ⁴ A mac watx'to wal xol eb, lajan wal yetok te q'uix. A mac tojtolto wal chi yunej, lajan wal yetok te cak q'uix. Palta xin, cawilxa chi jayoc c'ual yet ok ak'lay yailal e yiban yuj Dios, axca max yun yalon el eb chekbej yuj Cham. Axac'al somc'ulal ok aj can e xol.
- ⁵ C'amokab wal che yaoc yin e c'ul tzet chi yal e vecino, tamwal che yaoc junok e yamigo yipok e c'ul. Chi camc'al e naon tzet che yal yetok e yetbi.
- ⁶ Yujtol a eb c'ajolej, ok buchcan el eb is mam, c'al eb ix une'ej ok pitnej ba eb bay is txutx, c'al eb ix alibej ok oc eb ix ajc'ulal yin yalib. Acaw eb ayic' yul yatut ok yajc'ulnej ba.
- ⁷ A pax ayin ti xin, a Jehová ayoc yipok in c'ul. Asan Dios in Colomal chin yipc'ulnej, yujtol ok yab Cham tzet ok wala'.

A yuj Jehová ok je' yuj eb israel

- ⁸ Ex tol ajc'ul ex oc jin, manchak ex tzaloj yuj tzet chon oni. Caxc'al chon ayc'ayi, palta ok on aj pax wan junelxa. Caxc'al chi oymoj oc k'ekk'inal jin, palta a Jehová ayoc co sakk'inalok.
- ⁹ Max oc co mul bay Jehová, yuj tu' xan ok jak' techaj is yowal c'ul, masantac'al yet ok on beyc'ulnen Cham, ok watx'nej el co k'anej. A Jehová ok yak' jil sakk'inal, ok jil tzet ok on yut colon el Cham.
- ¹⁰ Ok yak' Cham yil eb jajc'ul jun ti', toxac'al ok q'uixwokcan aj eb yuj. Max yalon eb ayon axca ti': ¿Baytal ay Jehová e Diosal tu'? xi eb.

Palta a tinani' ok jil wal yayc'ay eb, cax ok tec'lay ay eb, axca wal tec'lay ay tx'otx' tz'otz'ew bay yulak calle.

- 11 Ex aj Jerusalén, ok ajapnok c'ual yet ok ca watx'nelay aj murallail e conob, c'al bic'oj e makbej.
- 12 Toxa chi jay is c'ual yet ok jayoc juntzan anima ayex, petoj eb bay masanil nación. Ok tittac'al bay Asiria, c'al bay Egipto, cax ok tittac'al bay a' Nilo c'al bay a' Éufrates. Ok tit eb tac'al bay a' marlak, c'al bay siquikal tx'otx' bay najat.
- 13 Tz'inan tx'otx'xac'al ok yuncan yulyibank'inal, yujc'al is mul eb cajyom.
- 14 Taynej a conob Mamin, axca no' a calnel tol et yayji. Aycan bay xolak k'akte' tx'oklil, axa bay yinlak xin, ay wal yax ac'unlak. Itok axcac'alta' max on yet payxa, bay lobal calnel bay yet Basán, c'al yet Galaad.
- 15 Chi tak'wi Jehová, chi yalon axca ti': Ok wak' e yil tzet yetal tol c'ayubtakxac'al, axca max wun yet max ex eltek bay Egipto, xi Cham.
- 16 Yuj tu' xan ok yil juntzan nacionlak, cax ok q'uixwokcan aj eb e yuj, caxc'al miman yipalil eb; axa ok yuncan aj eb, axcaxac'al tol c'am chi je' k'anjab eb, cax c'am chi je' yaben eb.
- 17 Yinxac'al xiwc'ulal ok jutxic' ba eb xol pokok axca labaj. Ok eltek eb bay is cuartel yuj wal xiwc'ulal eb tu'. Ok xiw eb ayach, ach Jehová co Diosal.

Chi ak'lay tan is mul conob Israel yuj Dios

- 18 C'am junokxa Dios lajan etok, yujtol ach ti', ach chak' tancan is mul jantakto eb a conob chito cani; chi tojcan c'ayc'ulal is yec'nakilal eb oj. C'am chi ayji ec' yowal a c'ul yin tojbalk'inal, yujtol chi el wal yin a c'ul a tx'oxon a camec'ulal.
- 19 Cusokab a c'ul jin on junelxa. Axca tol cha mukcan aytok co mul on. K'okcantok co yobtakil on bay najatil yich a' mar.
- 20 Ayokabc'al a watx'c'ulal c'al a camec'ulal jin on Mamin, axca max yun ak'on a ti' yettaxc'al payxa bay eb jichmam on, a ton Abraham c'al Jacob.